

欽定剿平三省邪匪方略

欽定剿平三省邪匪方略正編卷二百三十四

辛酉年

二月初一日

丁未

書麟倭什布長齡奏言竊

臣等

前在房境之天池垵白玉坪壽陽坪等處三路

兜剿賊匪痛加殲戮該匪等因官兵跟剿甚緊

分爲數股四處牽縈我兵

臣

等仍不帶鍋帳裹

帶餱糧挑派馬步精銳倍道追馳該匪情急總

由僻徑荒山雪深泥厚之處狂奔使我馬力不

能緊趕步兵易於疲乏實爲可恨

臣

等熟思窮

追無益自應分道抄截當派令孫清元吉林泰

等爲一路由洪坪一帶前進

臣

長齡明亮分爲

兩路由田家壩兩河口一帶前進

臣

書麟倭什

布接據竹山縣范繼昌稟報該縣北面緊接陝

省白河洶陽有不知姓名股匪窺伺楚境卽由

霍山一帶過其闌入之路遂於十九日馳抵郭

家洲地方據直隸把總林成會外委李耀傑報  
徐逆屯聚黃沙河肆行焚掠另分一股賊匪攻  
圍馬鹿寨臣等於二十日四鼓發兵自郭家洲

渡河翻大雪山過土地嶺至黃沙河據該處寨  
民稟稱賊匪聞大兵前來已向西竄現在馬鹿  
寨有賊攻圍十分危急當卽督率馬步官兵趕  
緊前進及抵該處逆匪正在四面攻圍臣長齡

率同侍衛富翰雙福等帶領侍衛塔津保恒坤等及河南廣東官兵由右手山梁抄擊賊匪不料官兵猝至遂回身下壓我兵奮勇直前鎗箭齊發立時斃賊二百餘名搶獲驟馬十二頭匹刀矛旗幟四十餘件該匪不能抗拒卽入山溝林箐四竄該寨居民得保無虞詢據土人云此山溝東通縣河舖保豐下達竹山西通水坪竹

谿等處當卽鼓勵兵勇分投搜捕擒獲黃得貴  
等八名訊據供稱今早徐掌櫃同張元帥帶領  
數千人先往竹谿攻城何總兵帶領我等分爲  
兩股一向保豐東去一向水坪西去聽他們商  
議若官兵東追我等由西抄後若官兵西追我  
等由東抄後等語餘無要供當卽正法並據防  
守竹谿縣城副將樊雄楚叅將姚國棟署知縣

郭淵極稟報賊隊逼近城廂攻撲當卽帶領千  
總武舉等及鄉勇首領挑派官兵一百八十名  
鄉義勇四百五十名分路迎擊該匪抗拒千總  
吳瑜恩等督率兵勇首先衝入斃賊二十餘名  
吳瑜恩力竭陣亡千總職銜胡承烈臂受矛傷  
一處武童蕭漢忠身受矛傷二處該署令郭淵  
極奮勇接應將屍搶回武舉聞元獲賊一名搶

馬四匹守備陶明鎗斃帶翎騎馬賊匪一名該  
匪始暫敗退稟請救援等情臣等查竹谿守城  
兵勇單薄所關匪細當令侍衛呢瑪善副將朱  
士奉帶領馬步官兵一千餘名馳往保豐一帶  
截其東竄之路臣長齡明亮等卽督催官兵星  
飛追趕西竄之賊行抵水坪道路平坦我兵馬  
隊急先馳射斃賊二百餘名生擒錢富有等十



三名匪衆捨命狂奔直抵竹谿時徐逆等正在  
攻撲城垣焚燒關廂經樊雄楚姚國棟郭淵極  
督率兵勇竭力堵禦居民驚懼之際我兵趕到  
併力進攻徐逆等始行慌亂我兵遂向樹嶺岡  
一帶追殺時已酉末且官兵日半奔馳一百五  
十餘里不得不暫令歇息提訊獲賊錢富有等  
供稱徐掌櫃帶領男婦老幼並裹脅之人有六

千餘名派出矛手四散焚掠率綴官兵令日被  
官兵殺斃許多戰手他們分投逃竄等語訊明  
後卽將該犯等十一名立時正法李朝梁等二  
十餘名訊係被裏良民當卽釋寧侍衛呢瑪善  
副將朱士奉由東截剿之賊亦已北趨並據孫  
清元稟報沿途追剿亦有俘戮已抵石板河自  
南而北可期合擊

臣

長齡明亮五鼓督兵卽由

樹嶺岡一帶隨探隨剿臣書麟倭什布因陝省

白河緊接楚省竹山鄖縣賊匪一經東竄即可  
由鮑家店偷渡黃龍灘刻下正當水涸之時且  
賊情詭譎探知我兵俱向西北不難折而東趨  
不可不防是以抽撥兵勇卽由竹山北境分路  
兜剿兼顧東面之路並令總兵德昌督率兵勇  
嚴爲防範此次打仗陣亡兵勇另冊咨部辦理

再臣等正拜摺間又接孫清元來信於二十一

日帶兵跟追行抵白沙河三更時賊衆潛來攻  
撲營盤各營官兵鎗擊箭射叅將常德楊安遊  
擊毛秉剛督同將備帶兵出營擊斃賊七十餘  
名生擒四名當卽正法五鼓帶兵追至泉河地  
方該匪正在掠食馬步官兵奮勇齊進又斃賊  
一百餘名生擒七名搶獲騾馬旗幟鎗矛等件

餘匪俱向大雪山深林遁匿獲賊陳有才等訊據供稱係四川開縣人師傅張允壽老掌櫃徐添德昨日商議張允壽帶好矛手四五百名前來抵住官兵以便大隊四處擄掠度日總要抄襲官兵後隊黑夜偷營昨夜撲營許多戰手被傷不料官兵今又趕到我逃走不及被拏等供當卽變割其餘被裹良民十數名當令土人認

識領去現在仍由秦坤一帶兼程追剿打仗兵  
勇間有傷亡查明另報等語臣等仍飭該鎮上  
緊相機剿截毋使蔓延

書麟又奏言查湖北省荆襄一帶頻年遭賊蹂  
躪小民蕩析流離其飢寒困苦之狀蒿目傷心  
此時急宜撫綏噢咻俾得樂業安居庶地方益  
增寧謐權其輕重實與剿捕並關緊要非實心

任事大員督率經理恐地方官奉行不力難收  
實效臣身在軍營正當剿賊喫緊之時既難兼  
顧姜晟係奉

旨左楚專辦軍火糧餉於地方事務究恐呼應不遑  
伏思撫臣倭什布從前久任知府後在陝西藩  
司任內民情極爲愛戴至今猶有去後之恩臣  
所深悉其於民間疾苦與愛養之道必更勝於

行軍定能經理妥協且現奉

諭旨將嘉慶三年以前軍需銀兩先行報銷亦須綜核具題相應仰懇

聖恩飭令倭什布前赴荆襄省城一帶專辦撫卹報銷事宜并就近與姜晟會同籌辦軍火糧餉

臣

得免內顧之憂專心戎事實於地方軍營兩有

裨益



書麟又奏言竊照行軍之道必須糧餉充足支  
放如期使士馬飽騰方能責以紀律臨敵效命

臣

抵軍營後檢查軍需局報文計算每月需用

餉銀除官兵追剿往來無定運送糧餉軍火脚  
費并遇陝省官兵追襲入楚就近支給糧餉難  
以定數外所有現在楚省前敵及邊卡馬步征  
兵鄉勇所需鹽菜運費及供支雜項每月共約

需銀十三四萬兩嘉慶五年奉撥部庫銀四十萬兩廣東省兩次共銀四十二萬兩河南省銀十萬兩又經姜晟奏撥湖南省銀十五萬兩又借撥湖南餉銀五萬兩湖北藩司鹽道庫銀四十一萬九千兩統共收銀一百五十三萬九千兩連閏計算本不敷用以致各處兵勇餉銀不能如期全支截至年底長齡明亮所領兵勇共

積欠銀七萬九千餘兩曾經長齡等咨會倭什  
布有案此外孫清元所領兵勇及各卡兵勇餉  
銀亦皆有積欠現飭查報尙無實數伏思兵勇  
餉銀乃日用所需若不早爲清給必致藉口挾  
制所關匪細查上年十二月經倭什布奏奉撥  
銀六十萬兩內江西省二十萬兩現已解交藩  
庫臣飛飭全數解至襄陽其山東省銀二十萬

兩先經倭什布咨會徑解襄陽廣東省銀二十萬兩亦咨會於上年十二月初六等日分批起解計期均可陸續解到臣俟前項銀兩解省後將積欠兵勇餉銀先行全數清給以後應得餉銀俱令按期給發毋使再有欠缺以免兵勇藉口并咨會姜晟倭什布核計餘剩之銀尙足供幾月之用預爲籌備源源接濟

書麟倭什布又奏言現當軍務喫緊之時其在  
事各州縣必得明示賞罰使知互相激勸查此  
次奉

旨飭查之竹山縣知縣范繼昌該縣向無城垣自元  
年被賊殘破居民轉徙靡遺該令捐貲築城招  
集流離練勇殺賊民心極爲愛戴運供各路軍  
儲迄今五年從無一誤又陞銜頂戴鄒西縣知

縣孔繼楹激勸義勇於漫川上津各要隘者禦  
賊匪屢有殲擒民心悅服是以每遇賊警義勇  
不招而集以上二員可否

加恩賞戴藍翎俾各州縣聞風激勸又署竹谿縣知  
縣郭淵極辦理糧運邊防團勇築寨均屬認真  
現在捐廉倡修城垣工程垂竣該員已捐陞知  
州例應離任赴選現在未便更易生手應請留

於湖北遇有簡缺知州缺出卽行請補侯竹谿  
本任知縣徐如瀨到日再行交卸又署均州知  
州吳文璟辦理團勇築堡及一切軍務三載以  
來均無貽誤該員已捐陞知府例應離任現亦  
未便更易應請留於湖北遇有簡缺知府缺出  
卽行請補侯均州本任知州蕭與潔到日再行  
交卸臣等因范繼昌等勞績久著現當用人之

際不敢不據實上陳均奏入

上命軍機大臣傳諭書麟倭什布長齡曰書麟等旬餘以來未見續有馳奏正殷盼望本日報至祇係分道抄襲徐逆一股賊匪雖有殲擒不過四百餘名而孫清元一路斃賊亦祇百餘名未能將首逆徐添德及張允壽殲擒殊未愜意徐添德係積久著名首逆最爲兇狡現據獲賊供稱分爲兩股若



官兵東追由西抄後若官兵西追由東抄後詭詐  
異常實爲可惡今書麟等分路兜截不致墮賊奸  
計但伊等所帶多係吉林黑龍江馬隊精兵素稱  
趨健應卽乘勝殲此渠魁不可再有遲緩現在勒  
保在川剿辦樊徐等逆旣能將嘉陵江保護無虞  
又將首逆徐萬富殲斃大獲勝仗德楞泰在陝更  
能將極惡首逆高二殲除而額勒登保剿辦高三

馬五王廷詔等股亦屢得勝仗陝西漢江南北指  
日便可肅清書麟等同膺重任且楚省祇有徐逆  
一股節經痛剿爲數無多現又竄至竹山一帶該  
處多係平地正可施展兵力何以未能迅速辦竣  
書麟等當督率鎮將上緊奮力兜截若能將徐添  
德張允壽設法生擒當遵照前旨卽在該處凌遲  
傳首川陝地方如臨陣殲斃亦必驗明屍身帶割

傳首示衆並將餘匪一律殲除勿留餘孽此卽書  
麟倭什布長齡明亮四人之功朕必優加懋賞萬  
一未能卽將徐張二逆殄滅逼令竄出楚境伊等  
亦尙無大過然亦無功足錄若令賊深入楚境或  
偷渡黃龍灘則伊等不能辭罪凜之愼之此時總  
須顧住東北向西南逼剿爲要又據奏請將知縣  
范繼昌孔繼楫賞戴藍翎一節該二員在楚出力

朕所素知但此時楚境賊匪尙未殄除若遽加恩  
賞事出無名著將該二員存記俟職擒徐張二逆  
時書麟等再行保奏一體加恩至請將捐陞知州  
之署竹山縣知縣郭淵極捐陞知府之署均州知  
州吳文璟仍留楚省辦理糧運團勇事宜著照所  
請均留湖北分別以簡缺知州知府補用又據奏  
查明軍營積欠官兵餉銀及每月約需數目一節

楚省餉銀據稱每月約需十三四萬兩近又續撥銀六十萬兩赴楚均可陸續解到除還積欠銀七萬九千餘兩外卽加以孫清元一路積欠兵勇餉銀至多亦不過八九萬兩所剩之銀足敷數月供支豈此數月內尙不能將徐逆等剿盡耶書麟佞什布當令局員樽節辦理不可因現在餉項充裕稍滋糜費卽楚境賊匪辦竣所餘餉銀有應辦善

後事宜尙須動用此後書麟倭什布每月將動用  
餉項若干隨報便具奏一次以備查核又據奏請  
飭令倭什布前赴荆襄省城一帶專辦撫卹報銷  
事宜一節所奏甚是姜晟現調任直隸總督在湖  
北辦理諸事究恐呼應不靈而書麟正在軍營專  
任剿賊於地方事件又未能兼顧倭什布係本省  
巡撫且於帶兵打仗非其所長不若令其專辦軍

火糧餉及地方撫卹諸事較爲妥協但武昌省城  
離軍營較遠荆襄係適中之地倭什布或在荊州  
或在襄陽駐紮照料一切更爲近便至總督應辦  
之事其緊要者自當仍聽書麟酌辦若尋常事件  
倭什布并可就近兼理姜晟接奉此旨卽起程來  
京請訓赴直隸新任所有在竹谿打仗陣亡之千  
總吳瑜恩著咨部賜卹

同日書麟又奏言查河東河標兵四百九十五名原駐鄆西縣屬毗連陝界之蒿坪堽一帶向係糧道恒慶帶領剿堵

臣

欽奉

諭旨飭知該道查明前項兵丁是否得力應否更換據該道稟報現存山東河標兵二百五十餘名原係操防兵丁並非打審下埽辦工之兵人俱強壯技藝純熟操防勤奮現當賊匪肆竄分撥



防守在在喫緊若撤令回營另募鄉勇恐技藝  
生疎不能得力等語查湖北下游各標營兵丁  
數年來已陸續抽調餘存之兵僅敷防守本汛  
不便再行調撥所有現存山東河標揀防兵丁  
二百五十二名既據領兵道員恒慶查覆尙屬  
得力合無仰懇

恩准仍留鄭西邊卡協同堵截其已經遣發回營二

百四十三名容臣於本省得力鄉勇內揀選補

數毋庸再由河標撥補至此外派防兵丁有傷

殘病廢者俱經隨時由領兵大員遣回原營其

雖非傷殘病廢而年力較衰膂力怯弱不能得

力者亦不便任其濫竽糜餉臣已移行領兵各

員逐加甄別所缺之數亦卽於強幹鄉勇內撥

補以期一兵得一兵之力

書麟倭什布又奏言

臣

等欽奉

諭旨責成各該督撫令各州縣認真團勇保護村莊  
等因仰見我

皇上軫念民瘼慎重守土之至意查向來州縣中全

材本屬難得一長足取即可量材器使

臣

書麟

去臘從荆襄一路馳赴軍營經過曾被賊擾之

處察看該州縣尙俱奮勉急公不辭艱險民情

亦俱安帖緣各路現辦軍務非尋常無事時可比各該員毋論本任署任俱經再三挑選始令供職茲蒙

聖明垂詢臣等公同查核如竹山縣知縣范繼昌鄖

西縣知縣孔繼榘精明強幹深得民心辦理防堵事宜最爲得力乃州縣中不可多得之員署

竹谿縣知縣郭淵極署均州知州吳文璟承辦

軍務料理地方俱能奮勉妥協其鄖縣歸州興  
山東湖遠安保康房縣穀城等州縣皆屬蹂躪  
之餘該員等不及范繼昌等出色而治劇理繁  
均無貽誤現飭辦理團勇禦賊此事最爲緊要  
容<sub>臣</sub>等察看各員中如有始勤終怠不能勝任  
者立即分別叅辦撤回另選幹員奏調斷不任  
其因循貽誤均奏入報

聞

初二日戊申書麟倭什布長齡奏言竊臣等昨於

馬鹿寨水坪一帶追擊並保護竹谿縣治殲戮

多匪臣長齡明亮於二十四日四鼓發兵由樹

嶺岡進剿行抵燕子溝該匪正在屯聚我兵奮

勇疾馳從上下壓該匪不及隄防慌忙潰亂馬

步官兵分道追殺鎗箭齊發由周家灣追至大

廟斃賊二百餘名沿途擒獲男婦二十四名口  
訊據獲賊張貴等供稱係四川達州人前年十  
二月歸入青號營裏拜任掌櫃爲師充當矛手  
因四川陝西年成平常徐掌櫃張元帥帶領六  
七千人來至湖北掠食我們矛手及馬隊共有  
二千餘人分作東西南北四路探信見有官兵  
卽繞道前行報知大隊此時徐添德稱爲老掌

櫃伊胞弟稱爲三掌櫃不知其名內總兵四名  
分爲東西南北管領大衆營中有礮兩位鳥鎗  
一百餘桿其餘皆係矛手馬有四百餘匹何總  
兵領前隊徐掌櫃張元帥走中隊陳總兵壓後  
隊張元帥等商議要將官兵誘至陝西界上他  
們依舊折回下竄草店子均州穀城一帶所以  
今日由大廟折東想明日總要向東急走聽說



陝西一股已到湖北邊界不知何號因官兵追殺利害想要與他合營我們最怕是馬隊弓箭鳥鎗等語查張貴等十九名均係正賊當卽正法其餘廖景照余林氏等係被裹民人俱解交署竹谿縣郭淵極查明釋放<sub>臣</sub>等細思若卽由大廟跟追恐反驅賊東下察其所往必向保豐是<sub>臣</sub>以等卽折回周家灣紮營次日五鼓由秦

家坪趕至保豐攔剿但周家灣至保豐約計一  
百二十餘里且山路崎嶇萬一行走稍遲難保  
不落賊後遂由得勝坡前進探得賊匪前隊馬  
步六七百人已至該處臣等當卽督率馬步兵  
丁翻越大樹堖山梁探報該逆等正在麻家渡  
圍攻太平寨侍衛富翰呢瑪善等帶領馬隊都  
司王占鰲千總楊永順張大勛首先趕至把總

麻光裕軍功黃興隆等帶領鄉勇亦卽趕到賊  
匪一見官兵卽分投抗拒官兵奮勇齊進鎗箭  
並發寨民見官兵追殺亦出寨助戰臣等鼓勵

官兵齊心努力人人奮勇爭先追殺賊匪衣帽  
盡行拋棄赤身逃命沿途殺斃三百餘名生擒  
張禮等十七名由火燒菴西溝翻山四竄時已  
戌刻官兵追殺一日計行一百六七十里馬力

未免疲乏因在保豐暫爲歇息活賊張禮等訛  
明俱係矛手從賊有年節次打仗餘無要供俱

卽正法

臣

等察賊所向係竄楊家牌樓之路並

據探報徐添德又分爲兩股一由文峪河奔逃

一向竹山東竄等情

臣

書麟倭什布適抵竹山

北境正值該匪大衆竄近縣西之潘口一帶其

勢直欲竄赴縣城附近居民頗形慌亂

臣

等卽

督兵迎截該匪望見官兵猝至亡命狂奔當有  
守備王萬岱帶領湖南兵丁奮勇追殺衝入賊  
隊斃賊二十餘名該備王萬岱戰兵黃文光各  
受矛傷數處力竭陣亡餘匪逃竄<sub>臣</sub>等一面安

撫居民人心稍定仍卽跟探賊蹤上緊剿辦毋  
使滋蔓此次打仗傷亡弁兵容俟查明咨部辦  
理再<sub>臣</sub>等體察賊情東西奔竄掠食卽逃本無

一定巢穴亦從無停留多日之事卽裹脅之人  
不過驅令負擔炊汲尙無要結人心之術兵力  
盛則竄避無蹤兵力單則頻來衝擾該匪之立  
見滅亡在此官兵之驟難痛剿亦在此總因五  
年以來兵則日疲賊則日狡楚省邊境雖節經  
臣等諄飭各卡監嚴密堵防但叅贊德楞泰等  
帶領重兵現在漢江北面截剿若由陝省遁入

川境則楚省二竹房縣等處邊地適當其衝頃  
據署竹谿縣郭淵極稟報刻接陝西平利來信  
伍金柱餘黨自安康竄來卽經分股一竄洵陽  
屬之王家坪其大隊仍在平利之尙家壩四郎  
廟一帶賊衆倏分倏合四出滋擾查王家坪四  
郎廟等處僅距竹谿縣城一百餘里又據守備  
王有探報黃墩塢塋壩一股賊匪竄至大橋河

屯紮又有化龍山一股賊匪六百餘名與大橋河之賊合夥共約千餘名驟馬數十匹在謝家灣大廟子一帶滋擾等語查以上各處俱逼近湖北竹谿縣西北二面各該匪雖所向無定但邊境綿長路徑叢雜旣在該處窺伺難保其不乘隙竄入且村莊無可擄掠勢將覬覦城廂尤不可不預爲計慮現飭城守空虛之處添雇鄉



勇實力守禦

臣

等前次奏明各省原調之兵撥

補足額一時未能到楚現有兵力剿辦一股尙  
可敷用設有別股紛竄一經分撥愈形單薄恭

讀

諭旨德楞泰本係叅贊應卽遵照前旨速赴陝楚剿  
賊等因查現在賊情多有自陝入楚之勢德楞泰  
由陝入川與由楚入川道里相同如果賊竄楚

境似應卽入楚境會同合擊較易蒞事臣等業  
已咨高德楞泰相機籌辦現在一面兜剿一面  
堵防總期餘匪不致闖入仰慰

聖廩奏入

上命軍機大臣傳諭書麟倭什布長齡曰湖北賊匪  
在燕子溝屯聚經長齡明亮帶兵擊剿跟蹤追殺  
先後斃賊五百餘名書麟倭什布前抵竹山適值

徐添德匪衆竄近縣西卽督兵迎剿擊退賊匪縣  
城得保無虞所辦俱好又據奏楚省邊界雖防堵  
嚴密但德楞泰等現在漢江北面截剿若由陝通  
入川境則二竹房縣等處邊界適當其衝楚省現  
有兵力剿辦一股尙可敷用設有別股分竄卽形  
單薄如果賊竄楚境似應令德楞泰卽入楚境會  
同合擊等語是書麟等所慮不在徐添德而慮他

股賊匪續有竄入難以抵禦欲令德楞泰前來相助耳然以現在楚省之兵果能辦完徐逆一股軍威日壯漢南之賊斷不敢生窺伺之心且辦現有之賊不必深慮未來之寇況德楞泰前次奏報殲斃高二摺內本有移師漢南之語因彼時餘匪尙未剿淨恐其捨之而去另交他人接辦又致敗殘餘匪乘間裹脅復成大股是以諭令暫緩移師一

俟江北肅清卽赴漢南剿辦今書麟等所稱逼近  
湖北邊界各股賊匪自卽係龍苟等逆現在川省  
徐萬富等逆業經勒保殲斃大獲勝仗已可無須  
德楞泰兼顧如漢南股匪欲竄楚境德楞泰自必  
權其緩急上緊截剿由東北逼向西南斷不將賊  
匪逼入楚境若此時必令德楞泰到楚轉逼賊人  
楚矣且俟德楞泰奏報到日再行相機指示現在

徐逆股匪至棄去衣帽赤身逃竄可見窮蹙已極  
書麟等惟當督率現有兵力剿淨此股以期共膺  
懋賞並於城守空虛之處添雇鄉勇實力守禦勿  
專待德楞泰到楚致誤事機爲要所有此次殺賊  
陣亡之守備王萬岱出著咨部賜卹戰兵黃文光著  
照外委例咨部賜卹

欽定勦平三省邪匪方略正編卷二百三十五

辛酉年

二月初三日

臣已

長麟奏言

臣

於正月十五日與

楊遇春合兵勦辦高馬等逆接准額勒登保來

信囑

臣

等以一路官兵抄截以一路官兵追勦

冀得兩面夾擊詎該匪因被楊遇春勦殺窮蹙

已連夜竄過二郎壩查由二郎壩西趨即可直

達江口一至江口官兵卽有岔路可以抄出賊

前該匪等狡猾異常不肯向江口奔竄徑由楊  
四廟都督河厚畛子一帶向北奔逃此一帶山  
險嶺峻石崖陡峭前無路徑可以抄出賊前勢  
不能不隨後緊追且山上僅有一線鳥道處處  
老林舊積冰雪本已盈尺而自十七十八十九  
二十等日風狂雪大不惟馬隊不能行走卽隻  
身步行亦屬艱難前進已屬不易倘後路再有



賊來則我兵腹背受敵卽至進退不能施展楊

遇春當將馬隊留交

臣

帶領退回二郎壩緊顧

後路楊遇春僅帶步隊並鼓勵兵勇將鳥道積

冰刨成階磴且刨且進冒雪緊躡賊蹤於十九

日昏暮始抵厚畛子探聞該匪又已翻過西老

君嶺逃遁查西老君嶺向北卽通辛峪口亦可

由辛峪口繞至桃統二川自寶雞竄往甘省又

可由東老君嶺寬河一帶折回四畝地賊匪趨  
向實難懸揣然必俟其趨向有定再行取道抄  
截又屬緩不濟急查該匪等若由東老君嶺折  
向東奔東面尙有前路官兵可以就近抄截北  
面亦俱派有鄉勇防堵惟西面毫無兵備且據  
沿途盤獲難民等僉供此股賊匪商議已定總  
欲由甘省奔往四川龍安一帶等語是臣此刻

惟應急顧西面臣現已帶兵由寇家關一帶前進查寇家關西北可通鳳縣寶雞既可以抄截賊匪竄甘之路東由黃草山可通都督河仍可兼顧楊遇春後路倘能於三兩日內迎遇賊匪必可與楊遇春兩面夾擊卽或該匪竄往甘省亦可就近與楊遇春竭力協剿斷不任其再有蔓延惟該匪等既有欲竄龍安之語不可不早

爲籌備且高馬二逆前會由甘省番地竄過龍  
安該處是其熟徑而階文一帶處處均可竄赴

龍安所關尤爲緊要臣現已飛札署涼州鎮副

將齊郎阿帶領新調官兵二千名趕赴階文一

帶扼要防堵務期無分兩夜兼程趕往並恐齊

郎阿於階文一帶情形生疎又添派鞏秦階道

朱爾漢協同照料該道於階文一帶尙爲熟悉

且曾經帶領鄉勇與賊接仗於戎行亦尙勇往  
又恐階文一帶道路分歧僅恃一路官兵或不  
免顧此失彼又派遊擊劉天秩另帶官兵九百  
餘名趕赴階文與齊郎阿作兩路防堵以期得  
力並已將高馬等逆欲竄龍安之處飛咨川督  
勒保迅飭派防龍安之鎮將等一體加意嚴防  
勿稍疎懈至冉伍等逆賊匪仍在漆扒一帶老

林藏匿十一日該匪等折竄四畝地穆克登布等趕到迎頭截殺斃賊數百名生擒一百餘名奪獲騾馬五六十匹該匪仍折回柴家關一帶奔竄穆克登布追剿前往額勒登保已趕至四畝地扼要攔截不致東竄又德楞泰追剿賊匪在山陽屬之乾溝磨溝一帶痛加殲戮殺賊數百名生擒及投出難民甚多餘匪由冷水溝逃

逸官兵乘勝追殺又復痛加殲戮德楞泰現由  
上官坊一路抄截前往又漢江南岸之龍紹周  
苟文明等股賊匪經總兵喜明革職總兵柯藩  
藩司溫承惠在平利屬之石廟子徐家場等處  
奮力截剿擒殲賊匪數百名奪獲大小旗幟並  
刀矛騾馬等件甚多餘匪折奔安康香河一帶  
逃竄距楚界稍遠喜明等現由東面向西兜截

奏入

上命軍機大臣傳諭長麟曰高馬等逆據奏竄過二郎壩後現由厚畛子地方翻過西老君嶺據難民等供稱此股賊匪有欲由甘省奔往四川龍安之語長麟此時帶領馬隊由寇家關前進與楊遇春爲兩路夾擊之計若數日內果能將賊匪趕上痛加殲擊不令竄入甘省固屬甚善但此股賊匪素



稱狡詐或已竄至甘境又思由階文一帶竄往歸  
安該處道路紛歧不可不嚴密堵截長麟現已飛  
札副將齊郎阿並遊擊劉天秩帶兵二千九百名  
分路防堵應飭令齊郎阿等在階文一帶扼要嚴  
防不可使賊匪一名竄入川境又致散漫惟當卽  
在甘省地方將該匪剿滅淨盡方爲妥善現在額  
勒登保已由四畝地一帶扼要攔截聞知高馬等

逆有竄往甘省之信自必緊躡追剿若長麟楊遇春二人能於經畧未到之前將該二逆痛剿擒獲並將餘匪殲殺淨盡卽屬伊二人之功倘縱令入川或又任賊匪折竄回陝聽其往來自如則該督等不能辭罪矣察之慎之

同日陸有仁奏言伏查陝省各路防堵官兵於設卡之初原不免多形殘弱嗣經帶兵大員隨

時整頓賊至則帶領以勦賊遠則日夕操練業已漸知振奮此時各營補額多係新兵若調來抽換不但營分遠近不一往返需時且恐初人營伍之兵其技藝尙有不如現在者似且可容會各路時爲上緊訓練以期日益整齊至名募鄉勇原以助官兵之不足如長麟防守沔寧一帶因邊界綿長數月以來僱募鄉勇頗多卽慶

成及各路防卡軍營亦俱僱有鄉勇協助此時  
若再添僱新充者技業生疎非操練數月不能  
得力是徒多費餉銀而無濟於目前之用查各  
路民勇前經臣派員到處宣布

聖諭鼓勵激勸並許以上卡之日給與包穀餬口頗  
能齊心禦賊如寧羌南鄭西鄉等處寨勇屢有  
協助官兵邀擊賊匪之事又紫陽縣生員張應

選集勇分卡防守自願每名每日捐給包穀一  
升該生之祖父兄弟從前俱因禦賊被害今復  
捐穀倡團義勇實屬可嘉臣已先行酌賞俟此  
後堵剿有功另行奏懇

天恩獎賞如果人人效法賊匪不能來往則激于義  
憤之民似轉勝于新募未練之勇臣惟有醇飭  
各路派定司道大員到處推誠激勸以期鼓舞

奮興收衆志成城之效並將各處寨洞上緊一  
律修整使賊無可擄掠庶官兵更易得手又賊  
匪被勦情急往往竄入老林賊在暗處官兵不  
能跟蹤深入而林內隙地零星居住之戶不能  
結寨者或飼養猪隻或收種包穀賊得藉爲口  
糧苟延殘喘其情最爲可恨臣再四思維南山  
老林處處皆是勢不能將林木盡行砍伐惟有

侯山內稍爲肅清卽派員分投馳往將林內所  
居之戶勸令盡行搬移出山著地方官妥爲安  
頓使賊匪入林無糧可掠自不能日久潛蹤統  
容隨時查辦奏

聞又寧陝廳設鎮事宜因上年至今賊匪出沒無定  
應募者少現止招得新兵六百名臣前與長麟  
酌商因計及各路隨營打仗鄉勇人數較多陝

省一經廓清此等強而有力之人易聚難散必須設法安插擬卽於新設之寧陝鎮標酌量挑派補伍又恐全用鄉勇難資約束卽酌挑各營額兵與鄉勇相間充補以安其身而分其勢再與長麟熟商趕緊酌定章程另行具奏至嘉慶三年以前應辦報銷臣現在督飭西安漢中兩局上緊清查逐款報部總期餉歸實用斷不敢



迴護徇隱再進下復據探報前竄山陽峒峪口  
賊匪經該縣謝濟經督率壯勇設卡堵禦放礮  
轟擊賊匪不敢東竄卽由峒峪口奔赴商州之  
黑山復經潼商道吳沂督同該州陳祁率領壯  
勇在於吳家莊坡上堵禦賊復折回山陽寨入  
下官坊進東溝至湘子廟一帶適叅贊德楞泰  
大兵趕到奮力截殺大得勝仗連次殲獲賊匪

一千數百名解散被裝難民無數俱經發交商  
州知州陳祁查訊妥辦餘匪無多分股向鎮安  
藍田交界之大陽坡二峪河並鎮安之雲蓋寺  
等處奔竄德楞泰及賽冲阿温春等分投緊躡  
追截現在商州東路無賊豫省邊界業已安堵  
又高馬等逆自經楊遇春等於藥壩痛加截剿  
並殲斃偽元帥方世杰後賊分兩股奔竄一股

由盤屋屬之大澗溝奔觀音峽有出留壩江口  
之勢一股由盤屋二郎壩竄至平定關楊遇春  
卽帶兵由二郎壩一帶兜截督臣長麟由留壩  
江口前赴寶雞之方柴關一路截勦經畧大兵  
自洋縣花園壩移赴寧陝之四畝地以爲東西  
兩路策應德楞泰所追殘敗之賊現向西趨經  
畧正可迎頭夾擊辦完一股再行以次掃除又

蓋屋山內竹子唐家場松花坪等處尙有零星屯聚之賊自卽是冉伍等逆分散掠食臬司王文湧現在帶領壯勇數百名於峪口一帶往來相機堵截並督飭該縣吳煥多團鄉勇聯絡聲勢以防賊匪竄越又賊匪龍紹周等股復經喜明溫承惠等在平利五顆樹陡溝口一帶節次截殺殲斃甚多鄉勇義首千總銜梅順陣亡

餘匪分股在尙家壩熊家壩曾家壩一帶奔竄  
喜明等現在分投馳勦以扼賊匪竄楚之路此  
時各股賊匪勢已十分殘敗經畧額勒登保連  
獲大捷叅贊德楞泰復於山陽一帶痛殲賊衆  
餘剩無多實屬大快人心事機極爲順利

臣正

在分投趕運糧餉之際仰蒙

皇上賞撥浙江省解京銀二十萬兩甘肅省例餉銀

四十萬兩俾二月分得資支應更可士飽馬騰  
剋期蕝事

陸有仁又奏言查陝省各路綠營官兵從前支  
領鹽糧尙有參差不齊之處自上年四月間接  
准經畧額勒登保酌定章程綠營兵丁遵照舊  
例每月支鹽菜銀一兩三錢並未分別口內口

外當經前撫臣台布行令各路糧臺及隨營將

員查照支放爲時已閱十月嗣因經畧隨營之內閣侍讀學士胡時顯以每兵日支口糧八合三勺不敷飽食奏請增給一升經軍機大臣會同戶部議覆嗣後緣營兵丁之隨征口外者其鹽菜銀兩例已加給四錢斷無不能果腹之虞毋庸再增口糧其在內地剿捕盜賊不出邊口者鹽菜旣照舊例祇支九錢其口糧似可仍照

舊例日給一升等因轉行到

臣當經

臣咨商經

畧額勒登保去後茲准覆稱目下各路兵丁悉已照口外之例支給尙屬拮据若裁減鹽菜加給口糧更爲掣肘只可仍舊支給等因伏查現在各路兵丁係在內地剿捕盜賊本應遵照部議分別支給鹽糧以期撙節惟緣軍興日久百物倍昂兵丁應支分例卽照每名一兩三錢給



發尙覺日食不敷刻下各路連得勝仗正當剿  
捕得手之時成功在卽兵丁等衝寒冒雪無不  
人人奮勵艱險備嘗仰蒙

皇上軫念戎行尙格外加之

賞恤今若以日久支慣分例因多給米一合七勺卽  
減其鹽菜銀四錢實不免更形竭蹶且查川省  
忠州營山等處兵丁卽因分例不敷奏蒙

恩准加給鹽菜銀四錢陝省事同一例合無仰懇

聖恩俯准查照上年春間經畧酌定章程每兵一名

仍以鹽菜銀一兩三錢支給亦毋庸增給一合

七勺口糧俾兵丁日用有資自更踴躍用命

臣

專司糧餉極欲諸凡節省以期支應寬餘惟目

擊兵丁艱苦情形又必須顧及大局是否有當

伏乞

臺上訓示遵行均奏入

此命軍機大臣傳諭陸有仁曰陸有仁奏各路剿賊  
獲勝情形一摺均係屬員稟報之詞據稱德楞泰  
追擊殘敗之賊現向西趨經畧自洋縣移赴寧陝  
正可迎頭夾擊等語此信確切又據稱各路防守  
現有該處鄉民倡團義勇齊心禦賊似此激于義  
憤之民轉勝新募未練之勇惟有推誠激勸以期

衆志成城所辦甚是惟據稱賊匪被剿情急往往  
竄入老林擬俟山內肅清派員分投馳往將林內  
所居之戶勸令盡行搬移出山交地方官妥爲安  
頓使賊匪入林無糧可掠自不能日久潛蹤統容  
隨時查辦等語此則不安山內民戶居住日久且  
各飼養牲畜種收包穀豈肯舍其生業搬移出山  
卽勸之亦必不肯從令且恐胥役人等逼令移徙

強以所難更滋擾累况山內居民甚多移出後又將作何安頓試思陝省賊營中節次投出難民尙不能一一安插得所又增此移徙之民而欲地方妥爲安頓談何容易若此語流播被賊聞知必轉相傳說以該民人等本有生業今經地方官逼勒遷移轉致口食無資用言煽誘寧不驅而從賊乎且南山如果肅清又何必復令居民搬出看來此

事陸有仁亦斷不能辦不過託諸空言於事無益  
而有損陸有仁著傳旨申飭此等事斷不宜輕舉  
妄動將來事定後惟當酌量情形或安設營汛派  
兵分駐以便隨時彈壓地方永臻綏靖又據奏陝  
省各路兵丁在內地剿賊不出邊口者請照經畧  
酌定章程每兵一名仍以鹽菜銀一兩三錢支給  
毋庸增給一合七勺口糧等語各路隨征兵丁均

已照口外之例支給此時若復照內地之例減給  
鹽菜銀兩卽增米一合七勺亦仍屬不敷祇可登  
照議定章程辦理可也

初四日

庚戌

額勒登保奏言查高馬等賊匪自經

楊遇春格布舍等勦潰後其勢益形殘敗嗣長  
麟亦帶兵趕至茅坪楊遇春與之會晤遂合兵  
由華陽山二郎壩一帶協力進剿該匪未能遠

竄連夜零星攀援仍遁入南山之楊四廟厚畛  
子都督河一帶逃匿而冉學勝股匪從王家河  
小王澗竄向安溝伍懷志股匪亦從黑河橋小  
王澗竄至田峪查此一帶均係深山老林險阻  
萬狀冰雪積滑人馬難行十七十八日又連下  
大雪路徑更屬不辨長麟楊遇春抵二郎壩之  
後公同商酌將馬隊留交長麟帶領在二郎壩



暫駐楊遇春格布舍帶領步隊官兵攜馬入山

尋蹤勦辦臣率同札克塔爾穆克登布豐紳等

進抵四畝地一帶探勦冉學勝伍懷志股匪亦

日在冰雪之中叠接楊遇春等所報情形甚爲

焦灼卽冉學勝伍懷志股匪急切亦未得痛勦

臣一面知會楊遇春格布舍等務須設法將各

股賊匪全行轟出南山如該匪北竄峪口長麟

卽帶馬步官兵從江口抄出西面與楊遇春等

夾擊如賊向東竄臣卽率兵由五郎之腰竹嶺

洵陽壩顧住東面相機截擊臣于二十三日已

抵紅崖山道路過險我軍實不能全隊深入已

令穆克登布豐紳等帶領步行兵勇先向甘家

編八斗坪前進相機探剿臣暫在紅崖山扼其

東去要路并為穆克登布等策應至洵陽過江

之賊臣連接德楞泰來信十二十三等日恐抵

山陽之高壩乾溝下關店一帶大獲勝仗斬獲  
二千餘人十六七等日追至曹家坪採玉窰等  
處趕上賊匪又殺賊三四百名並將首逆高二  
斌斃當將獲賊指認首級並質認衣服騾馬屬  
實現在餘匪不過三百餘人馬匹概行丟棄且  
半無器械向鎮安孝義深山竄逸現仍追蹤勦

捕卽可完竣等情查此股賊匪由洵陽過江惟

時臣因向西南追勦高馬股賊勢難兼顧適德

楞泰來至雙乳舖卽商定德楞泰帶兵迤往勦

辦今該匪等不惟不能竄入豫楚並連獲勝仗

將首逆高二殲除德楞泰諒臣詳晰具奏臣得

信不禁欣喜之至現並探得德楞泰所勦敗竄

餘匪已有向江口竄來之勢臣刻又四路差探

發兵截捕以期淨盡倘德楞泰日內亦由此一

帶追勦而來臣並得與之會晤籌商一切再臣

近據喜明溫承惠稟報戴家營曾芝秀餘匪等

於正月初間俱從弔陽關玉子坪紛紛向東奔

竄喜明馬玉魁溫承惠柯藩等從獅子壩分路

進兵於石廟子迎勦斬獲賊匪五百餘人賊匪

復分股由西北逃竄喜明柯藩溫承惠等恐其

由北向東遂帶兵勇分路由北面之毛壩向楊  
林抄截馬玉魁帶兵赴女媧山扼住東竄大路  
於徐家壩遇見賊匪馬步兵勇奮力競進殺賊  
多人賊匪仍折向西趨而龍苟等逆從西向東  
由尙家壩竄至五顆樹一帶喜明溫承惠等帶  
領兵勇截擊殲斃賊匪亦多惟鄉勇頭目梅順  
王朝貴陣亡兵勇亦有傷亡賊匪又折回西竄

此外尙有另股賊匪一千數百人由安康平利  
竄至曾家壩逼近楚境現酌商總兵馬玉魁帶  
領廣東官兵並派守備王英挑帶鄉勇追剿前  
進等語臣以該一帶賊匪分股亂竄倏東倏西  
該鎮等連次截剿尙能殺賊但所稱竄往曾家  
壩之賊究係何股曾否竄出楚境並未聲叙明  
晰現已飛行飭查且德楞泰所剿由洵陽過江

之賊前據探報係徐添德並黃號之賊嗣德楞  
泰帶兵往剿斬獲者係高二並未提及徐添德  
只有青號賊匪同竄諒係分股之人而接書麟  
來信徐添德在房縣一帶賊匪蹤跡無定看來  
徐添德正逆尙在楚境書麟統率長齡明亮孫  
清元等勦辦自可得手倘陝境又有竄去之賊  
則楚境兵力未免又單臣俟查探確切後卽當



酌派大員帶兵前往協剿又探聞樊人傑冉添  
上等已竄向蒼溪閬中一帶想七十五接據探

報自己帶兵剿辦臣疊次知會川省防江文武

務須先行緊顧嘉陵江岸當可不致踈虞查現

在楊遇春等所剿之高三馬五王廷詔等匪在

南山偏西臣派令穆克登布所剿之冉學勝伍

懷志股匪在南山偏東該匪等情急逸入藉此

山深林密以爲苟延殘喘之計臣屢囑楊遇春

穆克登布若能鼓勵兵勇在山內極力痛洗固

爲甚善否則務須設法由西南全行轟出並已

札知王文湧及盤屋郭縣地方官派勇於各峪

口擇要嚴堵俾免零星潛竄臣惟有隨時將各

路情形籌度上緊趕辦再臣近在漢江南北察

看地方山勢實屬遼潤寧陝一鎮業經議奏添

設而一切安營設汛之事尙未辦定總兵劉之

仁現在石泉一帶防守江岸臣已另行飭委副

將富蘭前往更替令劉之仁卽赴臣軍營與之

籌度面爲指示趕辦不日南山肅清趁此卽將

營制汛界一律妥設並安兵操防聲勢聯絡得

資堵剿自更一勞永逸

額勒登保又奏言竊臣欽奉

諭旨慶成係專派防江之員乃於高三馬五王廷詔  
及由洵陽竄過江北各股賊匪漫無防範慶成與  
派出緊守江岸之員均不能辭咎令臣查明叅奏

等因

臣

查漢江自紫陽以西爲江之上流水勢

本淺逐段均設有防兵自紫陽以東則爲江之

下流水勢漸大向未設有防兵皆飭地方官派

令團勇防範並將沿江船隻隨時趕撤以杜偷

越在案所有高馬等賊匪竄入西鄉時經慶成  
截勦該匪等折入紫陽境內維時西鄉地方尚  
有川省竄來另股賊匪慶成不能遠離西鄉跟  
勦其紫陽境內原派有額勒亨額率兵堵禦上  
年高馬等逆竄入紫陽之時總思倫撲江岸經  
額勒亨額帶兵自十二日起至十七日連日攔  
截該匪卽向南奔入小道河額勒亨額見該逆

既向南趨且距本管段落稍遠遂布置卡隘嚴飭官兵防守該匪等連夜乘間卽由大道河竄

至安康所屬之五塊石過江

臣

接據稟報恐尙

不確不得不詳加訪察再行奏以昭平允近

查得額勒亨額前後稟報截剿賊匪時日及高

馬等竄越江岸之期相符並無虛捏其安康之

五塊石北岸地方只設有鄉勇一百名十二

月十八日夜間賊匪猝至泗水偷過是晚有轉  
運軍米空船二隻柴船三四隻停泊北岸被賊  
搶奪一半躡淺一半船載而過鄉勇被賊衝散  
不能堵禦並訪得高二等匪被楚中勦潰竄入  
洵陽大棕溪過江亦係搶奪米船渡過該縣據  
報隨帶鄉勇前往賊已全數渡過均屬實情臣  
查慶成係總司防堵之員誠如

聖諭原難辭咎但慶成在西鄉堵賊距安康五塊石  
賊過之處有五百餘里相距洵陽大棕溪則有  
七百餘里實屬鞭長莫及况紫陽以東原未安  
有防兵且道路過遠臣從前亦未責成慶成兼  
顧除慶成一員應仰懇

皇上天恩免其叅處外至額勒亨額在紫陽防守本  
應先顧江岸當日晝夜截勦將高馬之賊趕入



小道河該逆乘間又繞向下游五塊石該副都  
統聞信亦曾帶兵前往而賊已過江雖非本管  
段落究與該副都統相隔只七八十里不能無  
過應請

旨將額勒亨額拔云花翎仍令在紫陽防堵以觀後  
效至安康洵陽二縣沿江本未設兵有兵之處  
往往爲賊衝出其所團鄉勇之不足深恃固無

足責予以參處尙不足以服其心然屢飭該令  
等務將沿江船隻隨時趕撤今賊匪過江仍係  
搶船而過似此踈玩均應一律示懲查安康縣  
知縣趙廷麒向日轉運軍糧及辦理一切事件  
尙屬出力應請

旨將安康縣知縣趙廷麒革去知縣降用巡檢典史  
等官其洵陽縣知縣薩玉衡旣未能預撤船隻

而訪其平日辦事亦無出力之處應請

旨予以革職至知府周光裕有率屬之責安康洵陽  
係該府所屬失於覺察咎亦難辭亦應請

旨將興安府知府周光裕降爲同知該守周光裕及  
知縣趙廷麒在任有年地方熟悉仍責令以降

官隨同現派之司道辦理團寨事宜勉圖報効  
再慶溥喜明馬玉魁溫承惠等本係責令截剿

賊匪並無專駐地方且各該員於十七八等日均在線河左林溝一帶分勦龍苟賊匪應毋庸置議奏入

上命軍機大臣傳諭額勒登保德楞泰曰額勒登保所奏祇係籌辦情形其各路殲渠獲勝之處已據德楞泰長麟等先後奏報至高馬股匪經楊遇春勦潰之後仍遁入南山之楊四廟厚畛子一帶而

伍冉等逆亦分竄安瀟田峪等處均係深山老林  
看來此數股賊匪俱已遁入南山又如上年那彥  
成帶兵在南山勦辦各股賊匪不能速行殄淨以  
致輾轉逃匿雖額勒登保素稱奮勇斷不肯稍有  
因循但賊匪入山後若任其潛匿日久俟至青苗  
在地又將四出掠食復成散漫何日始能蕝事耶  
朕之焦急實出於心不能以筆墨述額勒登保務

須督率帶兵各員設法轟出相機截擊若能逼回  
寧河一帶勦辦較易爲力否則亦當逼向西趨在  
陝甘交界處所合力奮勦總須自東而西自北而  
南驅令出險以期得展兵力不可又任北竄擾近  
西安所屬地方爲要至賊匪奔竄無常是其慣伎  
此時因賊蹤屯聚南山路徑叢雜冰雪交加難以  
得手若賊匪竄出南山復以地形散漫爲詞何時

始能辦竣至額勒登保接到德楞泰來信知首逆  
高一殲斃深爲欣喜並因徐添德尙在楚境慮及  
該省兵力較單現擬派兵協助以此通盤籌畫志  
在滅賊所見甚是惟德楞泰一路旣已殲渠獲勝  
若額勒登保再能速擒首逆馳奏捷音豈不更可  
忻喜乎至額勒登保以楚境尙未肅清恐陝省又  
有竄去之賊難以堵禦欲酌派大員帶兵前往協

勦一節德楞泰殲斃首逆高二後所剩餘匪無多  
現在帶兵追捕與額勒登保相距不遠此股敗殘  
餘匪額勒登保即可接辦或派令鎮將上緊搜捕  
以清後路至楚省兵力稍單卽令德楞泰前赴漢  
南截勦杜其入楚之路前因川北賊股較多曾諭  
令德楞泰入川督勦嗣因龍荀等逆逼近湖北邊  
界已令德楞泰於勦淨高二餘匪後卽行移師漢



南今川省黃藍等股在川北奔竄業經勒保分兵  
截擊殲斃徐萬富已得大勝並帶兵由嘉陵江一  
路兜截無虞西竄更可不必德楞泰兼顧其高二  
勦敗餘匪一經接手有人德楞泰竟當前赴漢南  
擇要進剿現在龍苟等逆經喜明等擊敗後已折  
回西竄其另股賊匪一千餘人自卽係龍苟等逆  
分股之賊德楞泰前赴漢南則龍苟等逆之東徐

添德之西有大兵橫截可以分投截擊龍苟等股  
既不能東竄楚境則楚省專辦徐添德一股亦易  
爲力是德楞泰移赴漢南督兵截剿卽所以兼顧  
楚北設樊冉等逆經勒保逼剿緊急竄入陝境德  
楞泰亦可就近迎擊三面皆可策應剿捕自更爲  
得力也額勒登保等務須籌畫萬全相機妥辦以  
期一鼓殲滅不可再有遲緩又據奏寧陝鎮營

設汛之事尙未辦定已飭令總兵劉之仁前赴軍營面爲指示趕辦等語地方防守事宜最關緊要而地方官總漠不關心前已降旨飭催今額勒登保飭令該鎮將寧陝應行安營設汛之處趕緊布置所辦甚是惟當速籌妥辦務俾該處成一重鎮爲南山一帶屏障庶聲勢聯絡得收堵截之效所有喜明等一路殺賊陣亡之鄉勇頭目梅順王朝

貴俱著咨部賜卹

上諭內閣曰額勒亨額係專派在紫陽一帶防堵之員駐守該處已越一載有餘此次賊匪在安康五塊石江面偷渡相隔祇八九十里未能預爲防堵實屬踈懈非若慶成遠在西鄉相隔數百里難於策應者可比額勒登保僅請拔去花翎不足示懲額勒亨額著拔去花翎仍交部嚴加議處知府周

光裕知縣趙廷麒薩玉衡於賊匪竄越過江時未能豫撤船隻以致乘間搶渡咎實難辭著照所請興安府知府周光裕降爲同知安康縣知縣趙廷麒降爲巡檢典史仍留該處隨同辦理團寨事宜以觀後效洵陽縣知縣薩玉衡平日辦事本無出力之處著卽革職